

1) Vrgl. I, Register.

1519 Okt. 7. J. J. a. liliis

III 192 Nr. 54.

171.

I 171.

Leonhard von Watt¹⁾ an Vadian.

St. Gallen. 1519. November 2.

Übersendung einiger Briefe durch Melchior von Watt. Rat inbetreff Ankauf eines Hauses. Empfehlung des Überbringers.

Gäben zů Sant Gallen uff aller selen tag im 1519. jar.

Min guinstlich gruß befor. Lieber her dockter, uwer gesonhait und deren, so uich lieb sind, hörend wir allzit gern. Ich send uich ettlich brieff

by master Melchior, den ich jetz wegfertig gemacht gen Rom zü ziehen. Die brieff sind an zit her hie gelägen; versich mich, eß sigend zwen von Ecktor von Wat und aner von Cünraten, üwerm brüder. Und hat mir uinser stattschriber gesayt, daß im Ecktor och geschriben haut von dem huß; wenn ir daß selbig wettend han um 900 fl. um gewägen rinisch gold, so wet er uichß laussen werden. Als ich mich versich, Ecktor und Cünrat schribend uich die manung och, da ist min bit und manung, ir schlachend im sölichß schlechtz ab und land in mit dem schaffän, was er well; dann eß wer zü tür. Eß ist och lang zit nit in güten eren gehalten; ir müstind zü dem minsten an 100 fl. verbuwen, daß eß uich mer dann 1000 fl. wurd kosten. Darum ist manung von uinserß nutz wägen, daß ir deß huß gantz müssig gangind. Wen gott git, daß die sterbenden löff gestillet werdend, zwiffлот mir nit, ir überkomend an huß um 2 oder 3 hundert gulden, darin ir uich wol mügend bedragen, so hetten ir danocht 700 fl. befor; die möcht man zü gwinnen anlegen, bis ir sehind, wie sich huß han üwer halb schiken wurd. Eß möcht uich also glucklich gan, daß ir mit besserm füg an koschlich huß überkomen möchtind. Gand Ecktors müssig; dann mir gfallend sin anschleg gen uinß gar nüntz. — Lieber her dockter, land uich master Melchior befolhen sin; gend im rat und schribend docktern Kasper von sinen wägen, daß er mit im düg, daß er man sin nutz zü sin, als ir wol wissend; damit er och zü gütem kom. Ich hoff zü got, eß söllend sich unsser sachen mit der zit zü allem güten schiken. Nit sonderß mer; grüssend mir üwer husfro Marta, üwern junkheren und sin husfrowen und kind und waß uich lieb ist. Hiemit sind got befolhen.

Lienhart von Watt.

Dem hochgelerten heren, dockter Joachimen von Watt, ietz zü Wädetschwil.